

मुख्य सचिव अटल डुल्लु होंरें औंदी रबी रूतें कोला पैहले जम्मू-कश्मीर च 100 फीसद योग्य करसानें गी प्रधानमंत्री फसल बीमा योजना दे दायरे हेठ आह्मने दी जरूरतें पर जोर पाया ऐ। इस सरबंघै च लाई गेदी इक जायजा बैठक दी प्रधानता करदे होई मुख्य सचिव

होरें बैंकें ते माली इदारें गी हुकम रसाल कीता जे ओह किसान क्रेडिट कार्ड धारकें दा पंजीकरण करन ते इस गल्लै गी जकीनी बनान जे फसल बीमा सरबन्धी दावें दा नबेड़ा बेल्ले सिर करी दिता जा। सरबन्धत अधिकारिणं गी निर्देश दिता गेआ जे ओह जिला स्तर पर हासल प्रगति दी निगरानी करने दे कन्नो-कन्नी, रोजै दी बिनाह पर करसानें दे पंजीकरण आहले लक्ष्य बी तय करन। ध्यानजोग ऐ जे मजूदा समें च प्रदेश च 11 लक्ख 50 जहार शा मते करसान प्रधानमंत्री फसल बीमा योजना दे दायरे हेठ आहन्ने जाई चुके दे न ।

<><><><><><>

### **Mid Night Marathon**

तंदरूस्ती ते सामुदायिक भागीदारी गी बढ़ावा देने दी इक्क बड़ी कोशिश दे तैहत जम्मू-कश्मीर खेड काउंसल आसेआ अज्ज 15 नवम्बर गी जम्मू दे मौलाना आजाद स्टेडियम च जम्मू मिड-नाईट मैराथन दे त्रीये संस्करण दा आयोजन कीता जाहग। आकाशवाणी जम्मू दे संवाददाता दी रिपोर्ट मुजब इस कार्यक्रम च सबनें स्तरें लेई बक्ख-बक्ख श्रेणिं च द्रौड़ें दा आयोजन कीता जाहग। एह मैराथन एम.ए स्टेडियम थमां शुरू होग ते शैहरें दिणं मुख थाहरें चा होइयै लंगघग।

<><><><><><>

### **JK Vande Matram**

राष्ट्रीय गीत “वंदे मातरम” दे 150 बरे पूरे होने दे उपलक्ष्य च हफ्ते भर चलने आहले समारोहें दौरान जम्मू-कश्मीर नै एहदे च भागीदारी लैने च राष्ट्रीय स्तर पर पैहली थाहर हासल कीती ऐ। केन्द्र शासित प्रदेश च बक्ख-बक्ख जिलें च विद्यार्थियें ते नागरिकें दी जबरदस्त हिस्सेदारी दिखने गी थोई। पैहले गेड़ दे समारोह दा समापन रामबन-रियासी ते कठुआ सने जम्मू दे बक्ख-बक्ख जिलें च कल लोआए गेदे सांस्कृतिक कार्यक्रमें कन्नै होआ। एम.ए. स्टेडियम जम्मू च लोआए गेदे समापन समारोह च 20 जहार शा मते विद्यार्थियें ते बसनीकें हिस्सा लैता। कार्यक्रम च राष्ट्रीय गौरव ते सामुदायिक हिस्सेदारी दी मजबूत भावना दा प्रदर्शन कीता गया। उत्साह कन्नै एह भागीदारी जम्मू-कश्मीर दी झूहगी सांस्कृतिक प्रतिबद्धता गी दर्शादी ऐ।



### **EoDB Award**

बपार कारोबार गी सखल्ला बनाने ते कारोबारी सुधारें सरबन्धी कार्य-योजना दे तैहत जम्मू-कश्मीर सरकार गी नमीं दिल्ली च आयोजित उद्योग समागम 2025 दे दरान टॉप एचीवर अवार्ड कन्नै सम्मानत कीता गेआ ऐ। उद्योग ते बपार मैहकमे दे कमिशनर-सैक्रेटरी विक्रमजीत सिंह होरें, केन्द्री मंत्री पीयूष गोयल हुंदे थमां एह सम्मान हासल कीता। जम्मू-कश्मीर गी सबनें राज्यें ते केन्द्र शासित प्रदेशें च 5मीं थाहर हासल होई ऐ ते एह सम्मान सरकार दी उस वचनबद्धता दा प्रतीक ऐ जेहदे तैहत जम्मू-कश्मीर च बपार-कारोबार दे मुआफिक तंत्र स्थापत कीता जा'रदा ऐ।



## Janjatiya Gaurav Diwas

राष्ट्र अज्ज स्वतंत्रता सेनानी ते आदिवासी नेता भगवान बिरसा मुंडा हुं'दी जयंती दे उपलक्ष्य च जनजाती गौरव दिवस मना करदा ऐ। केंद्र सरकार ने जनजातीय इतिहास गी जींदा रक्खने दे महत्व गी ध्यान च रक्खदे होई 15 नवंबर गी जनजाती गौरव दिवस दे रूप च मनाने दा फैसला कीते दा ऐ। समें दे कन्नै एह उत्सव जनजाती गौरव सप्ताह दे रूपै च विस्तारित होई गेआ ऐ, जिसी बक्ख-बक्ख मंत्रालयें ते राज्यें च सांस्कृतिक कार्यक्रमें, प्रदर्शनियें ते शैक्षिक गतिविधियें दे कन्नै मनाया जंदा ऐ- जेहड़े जनजाती नायकें दी विरासत गी जीवंत करदे न। तोआई प्रधानमंत्री नरेंद्र मोदी ते गृह मंत्री अमित शाह होरें अज्ज स्वतंत्रता सेनानी ते आदिवासी नायक भगवान बिरसा मुंडा होरें'गी उं'दी 150मीं जयंती पर श्रद्धांजलि अर्पित कीती। सोशल मीडिया पोस्ट च, श्री मोदी होरें आखेआ ऐ जे जनजाती गौरव दिवस दे इस मौके उप्पर समूलचा देश मातृभूमि दे गौरव दी राक्खी च बिरसा मुंडा हुं'दे बेजोड़ जोगदान गी पूरी श्रद्धा कन्नै याद करदा ऐ।



## Prog Announcement

आकाशवाणी जम्मू दा क्षेत्रीय समाचार एकांश 'राष्ट्री प्रेस दिवस' दे मौके पर औंदी 16 नवम्बर गी 25एं मिटनें दी इक विशेष परिचर्चा प्रसारित करने जा'रदा ऐ- जेहदा विषे ऐ लोकतंत्र च प्रेस दी भूमिका। कल तारें दपैह्री 12 बजे प्रसारित होने आहले इस बशेश

कार्यक्रम च स्हाड़े परौहने होडन जम्मू-कश्मीर दे वरिष्ठ पत्रकार ते डेली तस्कीन अखबार दे एडिटर इन चीफ सोहेल काजमी जेहड़े इस विशे पर अपने माहिराना बचार सांझो करडन। इन्दे कन्नै गल्लबात करडन स्हाड़े न्यूज एंकर जगमोहन शर्मा होर। एह कार्यक्रम तुस स्हाड़े इस्सै चैनल पर मीडियम वेव 303 मीटर यानि 990 किलोहर्टज ते एफ.एम 100 इशारिया 3 मैगाहर्टज पर सुनी सकदे ओ।

<><><><><><>